

Na osnovu člana 23. Statuta Brčko Distrikta Bosne i Hercegovine, Skupština Brčko Distrikta Bosne i Hercegovine na 33. sjednici održanoj 14. decembra 2001. godine, u s v a j a

## **ZAKON O IMPLEMENTACIJI ODLUKE KOMISIJE ZA ZAŠTITU NACIONALNIH SPOMENIKA IZ ANEKSA 8**

### **Svrha Zakona**

#### **Član 1.**

Ovaj Zakon o implementaciji odluke Komisije za zaštitu nacionalnih spomenika iz Aneksa 8. (u daljem tekstu: Zakon) utvrđuje mjere zaštite i obnove dobara koja su utvrđena kao nacionalni spomenici Bosne i Hercegovine odlukom Komisije za zaštitu nacionalnih spomenika, uspostavljene u skladu sa Aneksom 8. Opšteg okvirnog sporazuma za mir u Bosni i Hercegovini ( u daljem tekstu: Komisija).

#### **Član 2.**

Odredbe drugih zakona i propisa neće se primjenjivati ako su u suprotnosti sa ovim Zakonom.

### **Definicije pojmova**

#### **Član 3.**

Pojmovi koji se koriste u ovom Zakonu imaju slijedeće značenje:

-**“Nacionalni spomenik”** predstavlja dobro koje je Komisija utvrdila kao nacionalni spomenik Bosne i Hercegovine u skladu sa članom 5. Aneksa 8. Opšteg okvirnog sporazuma za mir u Bosni i Hercegovini (“Aneks 8”). Sve odredbe Zakona koje se primjenjuju na nacionalne spomenike primjenjivat će se i na dobra koja su upisana na “Privremenu listu nacionalnih spomenika”, u prilogu, sve do donošenja konačne odluke Komisije u vezi sa predmetnim nacionalnim spomenikom u skladu sa članom 5. stav 4. Aneksa 8;

-**“Odjel”** se odnosi na Odjel za urbanizam imovinsko pravne odnose i ekonomski razvoj Brčko Distrikta;

-**“Obnova nacionalnog spomenika BiH”** odnosi se na vraćanje oštećenog ili uništenog dobra u stanje u kojem je to dobro bilo prije njegovog uništenja do razumno moguće mjere uključujući i ponovnu izgradnju nacionalnog spomenika, na istom mjestu i u istom obliku, istih dimenzija i od istog materijala kao što je bilo i prije rušenja, uz korištenje iste tehnologije građenja kad je to razumno moguće.

## **Zaštita nacionalnog spomenika koje je utvrdila Komisija u skladu sa Aneksom 8**

### **Član 4.**

Podrazumjeva se da nacionalni spomenici uživaju najveći stepen zaštite prema zakonima Brčko Distrikta BiH.

### **Član 5.**

Nadležni organi i institucije Brčko Distrikta će spriječavati i suzdržavati se od preduzimanja bilo kakvih radnji koje mogu oštetiti nacionalni spomenik ili dovesti u pitanje njegovu zaštitu i obnovu.

## **Odobrenja koja se tiču nacionalnih spomenika**

### **Član 6.**

Sva odobrenja za zaštitu, konzervaciju, prezentaciju i obnovu nacionalnih spomenika izdaje Odjel.

### **Član 7.**

- (1) Odjel je dužan da izda odobrenje iz prethodnog člana u roku 30 dana od podnošenja zahtjeva.
- (2) Zahtjev iz prethodnog stava ovog člana sadrži sve priloge koji su navedeni u članu 11. ovog Zakona.

### **Član 8.**

- (1) U postupku izdavanja odobrenja u smislu ovog Zakona primjenjuju se odredbe Zakona o upravnom postupku, ako ovim Zakonom nije drugačije propisano.
- (2) Odluke koje donose Odjel u skladu sa ovim Zakonom su konačne.

### **Član 9.**

Odluke koje su u suprotnosti sa odredbama ovog Zakona ništavne su.

## **Član 10.**

Svi planovi prostornog uređenja izrađeni suprotno odredbama ovog Zakona ne primjenjuju se na zaštićeni prostor nacionalnih spomenika.

## **Član 11.**

Uz zahtjev za izdavanje odobrenja za obnovu, podnositelj zahtjeva dužan je priložiti izvod iz katastarskog plana, dokaz o vlasništvu ili pravu korištenja zemljišta, objekta ili kompleksa, historijski i graditeljski opis izvornog stanja objekta ili kompleksa sa postojećom arhitektonskom, fotografskom i drugom dokumentacijom, opis sadašnjeg stanja objekta ili kompleksa i projekta obnove objekta ili kompleksa. Zahtjev za obnovu objekata koji su potpuno uništeni uključujući i prijedlog glavnog projekta.

## **Član 12.**

U slučaju kad ne postoji dokumentacija na osnovu koje je moguće izvesti obnovu potpuno uništenih spomenika, u skladu sa odredbama člana 11. ovog Zakona, može se tražiti od Komisije da dostavi kriterije na osnovu kojih će se izdati odobrenje.

## **Obaveza prema Aneksu 8**

### **Član 13.**

- (1) Brčko Distrikt će uložiti sve dodatne napore da preduzme odgovarajuće pravne, naučne, tehničke, administrativne i finansijske mjere neophodne za zaštitu, konzervaciju, prezentaciju i obnovu nacionalnih spomenika.
- (2) Odjel može osigurati mjere iz prethodnog stava ovog člana putem instrukcija.

## **Obaveza saradnje**

### **Član 14.**

Službenici, organi i institucije Brčko Distrikta će u potpunosti surađivati sa Komisijom.

### **Član 15.**

Službenici, organi i institucije Brčko Distrikta će u potpunosti surađivati sa Odjelom i na njegov zahtjev osigurati mu svu relevantnu dokumentaciju.

## **Član 16.**

Službenici, organi i institucije Brčko Distrikta će u roku od 15 dana od stupanja na snagu ovog Zakona proslijediti Odjelu zahtjeve koji su u postupku, a koji se odnose na nacionalne spomenike.

## **Nadgledanje i stupanje na snagu**

## **Član 17.**

Nadzor nad provođenjem ovog Zakona vršiće Odjel.

## **Član 18.**

Inspeksijski nadzor biće vođen u skladu sa Zakonom o prostornom uređenju.

## **Član 19.**

Ovaj Zakon stupa na snagu osmog dana od dana objavljivanja u " Službenom glasniku Brčko Distrikta Bosne i Hercegovine".

Босна и Херцеговина  
**БРЧКО ДИСТРИКТ**  
**БОСНЕ И ХЕРЦЕГОВИНЕ**  
СКУПШТИНА БРЧКО ДИСТРИКТ

Bosna i Hercegovina  
**BRČKO DISTRIKT**  
**BOSNE I HERCEGOVINE**  
SKUPŠTINA BRČKO DISTRIKT

Broj: 0-02-022-473/01  
Brčko, 14. decembar 2001. godine

PREDSJEDNIK  
SKUPŠTINE BRČKO DISTRIKTA

**Mirsad Đapo,dipl.pravnik**

This document was created with Win2PDF available at <http://www.daneprairie.com>.  
The unregistered version of Win2PDF is for evaluation or non-commercial use only.